

Umhverfisstefna Borgarbyggðar

Borgarbyggð verði í fararbroddi meðal íslenskra sveitarfélaga í umhverfisstarfi. Fylgt verði í hvívetna ákvæðum laga og reglugerða um þennan málaflökk. Sjálfbær þróun verði höfð að leiðarljósi við ákvarðanatöku. Með því verði sveitarfélagið eftirsótt til búsetu sem fjölskylduvænt svæði með heilnæmu og aðlaðandi umhverfi. Þar verði þörfum núverandi kynslóðar mætt án þess að ganga á möguleika komandi kynslóða á að mæta þörfum sínum. Í þessu sambandi verður lögð sérstök áhersla á eftirfarandi þætti:

1. **Umhverfisfræðsla:** Sveitarfélagið mun stuðla að því að stjórnendur þess, starfsmenn og íbúar hafi greiðan aðgang að fræðslu um umhverfismál. Nemendur á öllum skólastigum fái vandaða og stöðuga fræðslu á þessu sviði. Markmið fræðslunnar fyrir stjórnendur og starfsmenn er að gera þá hæfari til að draga úr neikvæðum áhrifum sem starfsemi sveitarfélagsins kann að hafa á umhverfið, og til að stuðla að stöðugum úrbótum.
2. **Endurnýjanlegar auðlindir:** Sveitarfélagið og stofnanir þess munu af fremsta megni leitast við að nota endurnýjanlegar auðlindir í starfsemi sinni. Komið verður upp vistvænni innkaupastefnu, m.a. til að styrkja þessa viðleitni.
3. **Verndun lífríkis:** Sveitarfélagið leggur áherslu á verndun lífríkisins og varðveislu líffræðilegrar fjölbreytni. Að sama skapi er lögð rík áhersla á verndun gróðurs, jarðvegs, sjávar, menningar og menningarmínja.
4. **Umgengni og varðveisla landgæða:** Sveitarfélagið mun sýna gott fordæmi í umgengni og varðveislu landgæða og gera þær kröfur til atvinnulífs og almennings að því fordæmi verði fylgt.
5. **Skipulagsmál:** Sjálfbær þróun verður höfð að leiðarljósi við gerð skipulagsáætlana. Áhersla verður lögð á uppbyggingu útivistarsvæða og varðveislu náttúrulegra svæða í sveitarfélaginu. Tré og runnar verði gróðursettir og skjólbeltarækt notuð á opnum svæðum þar sem við á.

6. **Reysluvatnsmál:** Í öllum byggðum sveitarfélagsins þarf að vera greiður aðgangur að hreinu og heilnæmu neysluvatni. Komið verður á innra eftirliti með vatnsveitum í sveitarfélaginu og vatnsverndarsvæði skilgreind og varin.

7. **Úrgangsmál:** Lögð verður áhersla á að draga úr myndun úrgangs, í framleiðslu fyrirtækja, í verslun, þjónustu og á heimilum. Stefnt verður að endurnýtingu og endurvinnslu þess úrgangs sem engu að síður fellur til. Sérstök áhersla verður lögð á að jarðgera lífrænan úrgang sem til fellur í sveitarfélaginu.

8. **Fráveitumál:** Leitað verður vistvænna leiða til að uppfylla lög og reglur um fráveitumál. Reynt verður að fyrirbyggja að mengandi efni berist í fráveituvatn og séð til þess að útrásir í þéttbýli og rotþrær í dreifbýli uppfylli þær kröfur sem gerðar eru til slíkra mannvirkja.

9. **Atvinnulífið:** Í sveitarfélaginu verði öflugt og fjölbreytt atvinnulíf þar sem sjálfbær þróun verður höfð að leiðarljósi í vistfræðilegu, félagslegu og efnahagslegu tilliti. Sveitarfélagið mun hvetja fyrirtækin á svæðinu til að koma sér upp umhverfisstefnu og vinna að stöðugum úrbótum í anda hreinni framleiðslutækni.

10. **Hávaða- og loftmengun:** Kappkostað verður að tryggja íbúum sveitarfélagsins umhverfi til búsetu og útivistar, þar sem loftmengun og hávaðamengun er í lágmarki.

11. **LjósMengun:** Við uppsetningu og endurnýjun götulýsingar verður þess gætt að ljósmengun utan svæðis verði í lágmarki.

12. **Miðlun upplýsinga:** Lögð verður áhersla á skoðanaskipti um umhverfismál og á greiða miðlun upplýsinga um stöðu umhverfismála innan sveitarfélagsins. Í þessum tilgangi mun sveitarfélagið fylgjast með framgangi einstakra umhverfispátta og birta reglulega skýrslu um þróun þeirra.

13. **Skráning og nýting auðlinda:** Gerð verður stafræn skrá yfir auðlindir í sveitarfélaginu, þar með talin strandsvæði, vatnasvæði, beitolönd og efnisnámur. Sveitarfélagið leggur áherslu á að ákvarðanir um nýtingu þessara auðlinda verði ávallt teknar með hliðsjón af hugmyndafræði sjálfbærrar þróunar.

14. Staðardagskrá 21: Sveitarfélagið hefur staðfesta Staðardagskrá 21 í formi aðgerðaáætlana, í samræmi við samþykktir heimsráðstefnu Sameinuðu þjóðanna um umhverfi og þróun í Ríó 1992. Þessi umhverfisstefna er hluti af Staðardagskrá sveitarfélagsins, sem verður endurskoðuð og uppfærð reglulega.

Umhverfisstefna Borgarbyggðar var samþykkt af Umhverfis- og skipulagsnefnd þann 11. febrúar 2013 og staðfest af sveitarstjórn 14. febrúar 2013.